

2 Timotiu

Paru hã, maparane ãma te te duré ĩrob'ui'érézé, Timotiuhu ma Ĩbaihã wasu'uzé

Ã ĩbaihã na ma tô Paru hã Timotiuhu ma tin-himi'ui'ére na tãma ãma sahu, maparane ãma. Roma ãma dazazéb 're, hâimana sirõmo, ma tô tãma rob'ui'ére. Tidâ'âzé hã ma tô sina waihu'u, ĩromhutu na hã oto. Taha wa, ma tô tãma roti, Timotiuhu ma, 'Re ĩhâimana u'âsi mono si te te sina 're umnhasi pese mono da, duré Zesusihi ma, te te 're romhuri wẽ mono da zama. Ma duré tãma waihu'u, da'madâ'â'wa na sena na 're hâimana mono da.

1-2 ĩ'ra Timotiu, ĩma asawi pe hã, wa hã Paru wa ãma aima rob'ui'ére. 'Re ĩhâimana u'âsi mono hã te te sima ĩwêzéb uwaibaba, ma tô ĩpisutu, Cristu Zesusihi zadawa wasu'u'wa, 're ĩmorĩ da. 'Re ĩhâimana u'âsi mono hã ma tô dama ropisutu, rowẽ na ĩ'rata 're dahâimana u'âsi za'ra mono da, Cristu Zesusihi ãma 're danomro mono wa. ãne wa, taha wasu'u na te dama 're rowasu'u mono da, ma tô oto datẽme ĩzatõ.

Wamama ma, wa ai'ãma 're ĩmreme u'âsi, 'Re ĩhâimana u'âsi mono ma, duré Wanhib'apito Cristu Zesusihi ma zama, ĩsimizawizé hã ai'ãma 're hâimana u'âsi mono da, duré ai'ãma 're pẽ'ëzé u'âsi zahuré mono da, rowẽ u'âsi, ãma 're aimorĩ da.

Paru hã Timotiuhu ma, te te ĩrotizé wasu'u

³ Re ìhâimana u'âsi mono ãma, wa 're ìwata u'âsi. Marĩ na te tiwi ãma ì'upazém na, te te oto ì'ãma 're ab'madâ'â mono õ wa, wa oto rowẽ na te tãma 're romhuri u'âsi. Tane duréihã ma tô duré ìhi'rata norĩ hã te te tãma 're romhuri za'ra. Tawamhã tãma 're ìmreme mono wamhã, bâtã na wa aima te tiwi 're rowaptêrẽ u'âsi, barana zama, te te 're aipawaptob u'âsi mono da.

⁴ Aiwa'õzém na ai'ãma ìpo're pu'u wa, wa ìsima rowẽ za'êtẽ, te asabu da, rowẽ uptabi na 're ìhâimana mono da.

⁵ Duré Wanhib'apito zazei'wa na tô sena 're aihâimana mono na, wa ai'ãma po're puru. Ai'rada Ro'idi norĩ hã ma tô ana me hã Wanhib'apito zazei'wa na 're hâimana zahuré, E'unisihi me. Ta norĩ ne, tô sena Wanhib'apito zazei'wa 're aimorĩ na, tô ìma aiwaih'u'u pese di.

⁶ ãne wa, wa za ãma aipo're pu'u oto, 'Re ìhâimana u'âsi mono hã sõpru wa, te te aima ìsõmrizém na, dapawaptom na tãma 're romhuri mono da. Ai'rã nhisiwi ìnhib'rada hã te hiri wamhã, ma tô aipẽ'ẽ 're aima tisõ, ìwẽ hã. Taha wa, ma'ãpé asimi'ẽ na tãma 're romhuri u'âsi mono.

⁷ E wasina wapahi sina 're wahâimana za'ra mono da, ma tô 'Re ìhâimana u'âsi mono hã Tipẽ'êzani hã te te wama 're anhomri. Mare di. Wanhiptete sina ãma 're wahâimana za'ra mono da, duré wanhimizawi pese sina 're wahâimana za'ra mono da, duré wanhimirosa'rata na hã atãma 're wahâimana za'ra mono da, ma tô te te wama 're anhomri, Tipẽ'êzani hã.

⁸ ãne wamhã, 're asisé mono õ di za, Wanh'apito wasu'uwẽ hã dama 're wasu'u tõ mono

da. Duré ĩma 're asisé mono õ di za, ĩwasu'u na. Wanhib'apito wasu'uwẽ na te dama 're rowasu'u mono 'ru te, ma tō dasiwi ĩnherẽ ni, dazazéb 're. Taha wa, wa oto te 're robzépata. Āne wa, ma'āpé 'Re ĩhâimana u'âsi mono hã tinhiptede te te aima ĩsõmri na, sada 're asiptete mono, ĩsine 're robzépata mono da.

⁹ 'Re ĩhâimana u'âsi mono hã ma tō te te 're wa'anho'reptu, rowasété hawi. Ma tō duré te te sima 're wa'apisutu, ĩsib'a'uwẽ oto 're wahâimana za'ra mono da, wawẽ uptabi na. E marĩ wa, ma tō sima wa'apisutu. E marĩ ĩwẽ hã wa te dama 're 'manharĩ za'ra mono wa. Mare di. Taha wab õ di. Taré te te sima 're wa'awẽ mono wa, duré simizawi pese wa, ma tō te te 're wa'anho'reptu. Ma tō duré wa'ãma tinhib'a'uwẽ za'ra. Zahadu ropoto na te te sãna'rata õ ré hã, 'Re ĩhâimana u'âsi mono hã simizawi pese wa, ma tō sima wa'ãma roti sirõmo za'ra, te te 're wa'apawapto mono da, Cristu Zezusihi nhiminho'reptuzém na hã.

¹⁰ Wanho'reptui'wa Cristu Zezusi we datẽme ĩwisizém na, ma tō oto wama siwaihu'u za'ra, tinhimipawaptobzém na. 'Re ĩdadâ'â za'ra mono zé wasu'u hã, pipa nherẽ, ma tō wawi uprosi za'ra wapahi hã, Wanho'reptui'wa hã. Duré Wanho'reptui'wai wasu'uwẽ hã wa te 're ĩsaze za'ra mono zéb zarina, ma tō wama waihu'u za'ra, rowẽ na 're ĩdahâimana u'âsi za'ra mono zé wasu'u na hã.

¹¹ Taha wasu'uwẽ na te 're da'apo're pu'u mono da, ma tō 'Re ĩhâimana u'âsi mono hã ĩpisutu, Wanhib'apito zadawa wasu'u'wa 're ĩmorĩ da, ĩsimiroti na te 're da'apawapto mono da.

¹² Taha wa, te te ĩpisutuzéb zarina, te ĩsina

uwaimrami wa, wa oto te 're robzépata. Tane nherẽ, 're ãnhisé mono õ di, ãsadawa wasu'u'wa 're ãmorĩ tõ da. Wanhíb'apito hã wa ãsina te 're umnhasi, te te 're ãpawaptob u'âsi mono da. Ta hã ãma waihu'u pese di, ãwaihu'u pese na hã. Wa hã wa tõ tãma ãsiahãiba nho, tõ sena tãma waihu'u pese wa, te te 're ã'madã'ã mono zéb da hã, bãdã ãwa waptã'ã õ ré, apã we ãmorĩzéb u hã.

13 ãne wamhã, roti tõ sena hã te aima 're ã'awaihu'u mono hã, te za 're ã'madã'ã u'âsi mo. Cristu Zezusihi ãma 're aimorĩ wa, te za Wanhíb'apito umnhasi sina, 're aihãimana mo. Te za duré 're ãda'azawi pese mo.

14 Roti tõ sena hã te aima 're ã'awaihu'u mono hã, wẽ uptabi di. Ta hã te za 're ã'madã'ã pese mo, ãma 're ãda'apawapto mono da hã, aimawĩ rowasu'u na da te ãma saprĩ za'ra tõ da. Taha da, te za te 're aipawaptob u'âsi, 're ãhãimana u'âsi mono pẽ'ẽzani hã, wapẽ'ẽ 're, 're ãhãimana mono hã.

15 Azi'a na danhipti'a nho'õmo nhisi ãma, uburé ãsazei'wa norĩ hã ma tõ ãrẽme za'ra. Pideru norĩ zama, ma tõ Emozenihi me dame ãrẽme zahuré. ãne hã aima waihu'u pese di.

16-17 Onesiporuhu si ma tõ tinhimipawaptobzém na nasi ãma rowẽ zani. Taha wa, wa ãsima wẽ, Wanhíb'apito hã Onesiporu norĩ hã, duré ãsõrõwa ãma ãsiré 're ãhãimana za'ra mono norĩ zama, ãwẽ na te te 're apawapto mono da. Ta hã ãma 're sisé mono õ di, ãwasu'u na hã. Taha wa, Roma na 'ri nho'õmo nhisi u wei wisi wamhã, ma tõ te te ãzõ aba, te te ãnhopëté da.

18 ãne wa, wa ãsima wẽ, Wanhíb'apito hã ãwẽ na te te ãma tãma uwaimrami da, bãdã ãwa ãwaptã'ãzém

na, dahâimanazém na te te ĩda'awaihu'uzéb da hã. Onesiporu hã ma tô marĩ mono bâ nasi ĩpawapto, Épézu âma 're ĩhâimana mono ré hã. ãne na hã aima waihu'u pese di.

2

Paru hã Timotiuhu ma, roti te te tãma ĩsõmrizém na rowasu'u

¹ ĩ'ra, ma'ãpé ĩwapari pese, asina. Cristu Zezusihi âma wa 're wanomro. ãne wa, te za ĩsimipawaptobzéb zarina, asiptete sina âma 're aihâimana mo.

² ĩnhimirowasu'u hã ma tô aipo're na 're ĩwapari mo, ĩsazei'wa norĩ nho'a te dama 're rowasu'u mono wamhã. Ta norĩ hã ahã di. Tawamhã 're ĩ'awapari mono zé hã te za aibã norĩ ma 're ĩ'awaihu'u mo, aima ĩ'umnhasi za'ra norĩ ma hã, tãma waihu'u pese za'ra wamhã, ĩnhimirowasu'uzém na te te duré âma 're uzusi za'ra mono da, dapawaptom na.

³ Da'wapéi'wa dama ĩ'umnha hã dasi'wapéi 're, hâimana wamhã, te te 're robzépata tō mono da, si-sawi õ di za. Tane a hã, Cristu Zezusihi nhib'a'uwē na 're aihâimana mono wa, te za asina 're ĩsazei u'âsi mo, asisawi ãna ĩsine 're robzépata mono da.

⁴ Da'wapéi'wa norĩ hã tinhib'apito ma te te 're romhuri za'ra mono ré hã tãma wē za'ra di, ĩsib'apito ĩsimiromhuri na te te 're awēsãmri mono da. ãne wa, tinhiromhuri upana, marĩ mono bâ te te sima 're rosa'rata za'ra mono õ di za, te te sima âma 're uwaimrami za'ra mono da.

⁵ Duré, ni'wa hã dawara na hâimana wamhã, dawı watobro nherē, marĩ ĩwē hã te te sima âri õ di za, dawara na roti hã te te sina 'madâ'â õ wamhã.

Dawara na roti hã te te sina ã'madâ'âzéb zarina si, te za marĩ ãwẽ hã sima ti'â, dawi watobro wamhã.

⁶ Duré, buru na romhuri pire 'wa hã, amho hã uburé da te ubumroi pari, ãmorĩ'rata na te za tite da âri 'rata.

⁷ Ma'ãpé, ãma 're rosa'rata u'âsi mono, te aima ãrowasu'uzém na hã. Æne wamhã, Wanhib'apito hã te za te te 're aipawapto, ãhã wasu'u na hã 're awaihu'u mono da.

⁸ Ma'ãpé, Zezu Cristuhu ãma 're rosa'rata pese mono. Ta hã dâ'â nherẽ, ma tô ab're hawi hãiwa'udu, Dawihi nhihudu hã. Wanhib'apito wasu'uwẽ na te 're da'apo're pu'u mono wamhã, taha wasu'u na wa tô te dama 're rowasu'u u'âsi.

⁹ Tawamhã Wanhib'apito wasu'uwẽ na te dama 're rowasu'u mono 'ru te, wa oto te 're robzépata. ãwasédé hã te 're 'manharĩ mono newa, wa oto 're ãza, dazazéb 're, ãsi'uwazi nhorõ rutu na ãpawasisi ré. Tane nherẽ, 'Re ãhãimana u'âsi mono zadawa wasu'u hã pawasisi ãna ne, te 're hãimana u'âsi. Te za da te dama ãma 're rowasu'u u'âsi za'ra.

¹⁰ Te ãrobzépata da hã ãma pire nherẽ, ãsisawi õ di, te robzépata tõ da hã. Te 're robzépata mono nherẽ, 'Re ãhãimana u'âsi mono hã tinhib'a'uwẽ da, te te sima ãpisutu za'ra norĩ hã wa za te 're apawaptob u'âsi, Cristu Zezusi hã te te 're saze za'ra mono da, taha zarina tinho'reptuzé hã te te sina 're uwaimrami za'ra mono da, rowẽ na ã'rata 're hãimana u'âsi za'ra mono da.

¹¹ Tô sena da te dasima 're ãrowasu'u za'ra mono zé hã ãne:

“Cristuhu siré 're wadâ'â za'ra mono wa, duré ta hã dâ'â uptabi nherẽ, ab're hawi hãiwa'utu wa, wa za ãsiré 're wahãimana u'âsi za'ra.

12 Robzépada hã wa te wasina 're waihu'u za'ra mono nherẽ, wanhiptete sina ãma 're wahâimana u'âsi za'ra mono wamhã, wa za Cristuhu siré wapire na wa te 're da'madá'â u'âsi za'ra. Cristuhu zazei'õ'wa na dama 're wasiwasu'u za'ra mono wamhã, tizazei'wa na te te sina 're wa'awaihu'u mono õ di za. Te za te te siwi 're wa'awẽ'õ oto.

13 Wa norĩ hã Wanhib'apito ma, wa tô wasina tâma ropisutu za'ra ni, ãma 're wanomro u'âsi mono da. Tawamhã wa te wasina ãma tâma 're uwaimrami za'ra mono õ nherẽ, Wanhib'apito hã wama umnhasi za'ra di, uburé te te wama 're ã'aropisutu mono zé hã te te wama ãma 're ã'uwaimrami mono zéb da hã. Marĩ na taré te te dama ã'aropisutu da hã, mare di.”

14 ãhã wasu'u na te za asimi'madá'â norĩ hã ãma 're ãpo're pu'u za'ra mo. Te za duré aihâimana prédup sina tâma 're ã'aroti mo, 'Re ãhâimana u'âsi mono nho'a 're wahâimana za'ra mono nherẽ, taré marĩ wasu'u na 're sisada'âbã za'ra mono tõ da. Dasisada'âbãzé hã wẽ õ wa, taha zarina 're dahâimana za'ra mono wamhã, te za dawĩ 're si'utõrĩ, dahâimana wẽ zé hã.

15 Romhuri'wa nhimiromhuri hã wẽ wamhã, tinhiromhuri ma, 're sisé mono õ di za. Tane te za sada 're asiptete u'âsi mo, ã'uwaibaba si roti tô sena na si 're da'apawapto mono da, asimiromhuri na te te 're aiwẽsãmri mono da, 'Re ãhâimana u'âsi mono hã.

16 'Re ãhâimana u'âsi mono nhimiroti zarinaĩ õ na rowasu'u'wa norĩ nhiti, te za 're aihâimana mo. Ta norĩ nhimirowasu'u zarina, 're dahâimana za'ra mono wamhã, te za danhimirosa'rata na dasina

're dapahâ za'ra, Wamama nhimiroti nhiti.

¹⁷ Ta norĩ nhimirowasu'u hã da'wa're ne, te 're hâimana. Da'wa're hã sa'ětē wamhã, te za uprosi, danhi hã. Tane, ta norĩ nhimirowasu'u hã ĩsazei'wa norĩ âma te te ropéi mono wamhã, te za tiwi uprosi za'ra, dahâimana wē zé hã. Tane, Imenezu norĩ nhimirowasu'u hã Piretuhu nhimirowasu'u me.

¹⁸ Ta norĩ hã senai'õ na rowasu'u na te te dama 're rowasu'u zahuré, âne: “Tâibã, bådã ma tō ĩwa waptã'ã pa, 'Re ĩhâimana u'âsi mono ab're hawi te te ĩda'ahâiwa'utuzéb da hã. Niwab da hã te te âma sahu õ di za, te te ĩda'ahâiwa'utuzém na hã.” Āne ta norĩ nhimirowasu'u hã. Taha zarina ma tō dawĩ uprosi zahuré, Wanhib'apito wasu'uwē na da te 're ĩsaze za'ra mono zé hã.

¹⁹ Tane nherē, etē 'manharĩ na 'ri na'rada hã, siptete na 're ĩhâimana mono ne, te za 'Re ĩhâimana u'âsi mono nhimiroti hã pire na 're hâimana u'âsi. Āne ĩsimiroti na rob'ui'éré hã: “Wanhib'apito hã te za tinhib'a'uwē norĩ hã tite na te te 're awaihu'u.” Āne duré âma ĩrob'ui'éré hâiba amo hã: “Ni'wam norĩ hã Wanhib'apito nhib'a'uwē na dama 're siwasu'u za'ra mono wamhã, te za tiwasédé hã rēme pese za'ra, 're nomro wē mono da oto.” Āne ĩsimiroti na rob'ui'éré hã.

²⁰ 'Ri wawē âma hã piza hã ahâ na te 're hâimana za'ra, etē'ubuzi pré oru 'manharĩ hã, duré etē'ubuzi'a prata 'manharĩ hã, duré wede 'manharĩ hã, duré zé'a 'manharĩ hã. Nima norĩ hã, marĩ da hã wē uptabi di, marĩ hã da te âma 're ĩ'manharĩ za'ra mono zéb da hã. Duré nima norĩ hã marĩ da hã wē uptabi õ di, marĩ hã da te âma 're ĩ'manharĩ za'ra mono zéb da hã.

²¹ Tane ni'wam norĩ hã te aima ĩwaihu'u mono zéb zarina, tō senai'õ na rowasu'u'wa nhimiroti

hã te te siwi 're wẽ'õ pese za'ra mono wamhã, Wanhib'apito ma, wẽ uptabi di za, romhuri hã za te te tãma 're ã'apisutu mono da hã. Æne wa, Wanhib'apito ma, sisõmri za'ra wa, te za tãma pisutu za'ra, ãwẽ na te te tãma 're dapawaptob za'ra mono da.

²² Æne wa, dahâiba téb ré, dawasété zô 're ãdasiwasutu za'ra mono norĩ ne, 're aihâimana mono õ di za. Te za asina 're ãrosa'rata u'âsi mo, aihâimana wẽ na 're aihâimana mono da, duré Wanhib'apito umnhasi sina 're aihâimana mono da zama, duré asimizawi pese na 're aihâimana mono da zama, duré rowẽ na si dasiré 're aihâimana mono da zama. Taha da, te za asina 're ãrosa'rata u'âsi mo, uburé Wanhib'apito zazei'wa norĩ me, hâimana wẽ sina, ãsimipawaptobzéb zô te te tiwi 're ãrowaptẽrẽ za'ra mono norĩ me.

²³ Siwa'ru marĩ na 're dasisada'âbâ za'ra mono wamhã, 're dawapari mono õ di za. Æne, da te 're dazada'âbâ za'ra mono wamhã, te za oto damreme na 're dasi'wapé za'ra. Æne na aima waihu'u pese di.

²⁴ Ni'wa hã Wanhib'apito ma romhuri'wa na 're hâimana mono wamhã, timreme na te te 're da'a'wapéi mono õ di za. Simizawi pese na te za dama 're hâimana, aihĩni ma. Waimri na te za duré te te dama 're arowaihu'u, waptu na dazada 're sahi mono ãna.

²⁵⁻²⁶ Ni'wam norĩ hã ãsimiroti na hã sada 're hâimana za'ra mono wamhã, atãma te za tin-himiroti wẽ na te te 're pawaptob za'ra, tin-himirosa'rata na te te ãma saprĩ za'ra da, Wamama nhimiroti hã tô sena na te te sina waihu'u za'ra da oto, ãsimipawaptobzéb zarina. Wa'uburé norĩ

nhib'apito hã ma tô aré tãma 're sadawa nhipese za'ra, te te sima 're ãda'awẽ mono zéb uwaibaba, ãsimiroti na 're hãimana za'ra mono da. Tane nherẽ, a'uwẽ norĩ hã tinhimirosa'rata na te te ãma saprĩ za'ra wamhã, te za oto Wa'uburé nhimiroti hawi 're wairébé. Taha da, te za Wanhíb'apito ma romhuri'wa hã atãma te te 're apawapto, tinhimiroti wẽ na hã.

3

Rob'rãsutu u, za 're ãdahãimana wasété za'ra mono zém na rowasu'u

¹ Wa za oto marĩ na aima rowasu'u, ãma 're rosa'rata mono da. Nimahã na rob'rãsutu u hã romhuture wamhã, dama ropire di za.

² ãne dahãimanazé hã za: Dasima si te za marĩ zô 're danhopré. Duré rob'uiirazéb zô si te za da te dasima 're rob'ruiwapari za'ra. Duré 'rãwi dapẽ'ẽ na, te za marĩ na dasina 're dawata za'ra. Duré te za da te dasima 're nharĩ wasété za'ra. Duré marĩ na dama 're danhoprub za'ra mono nherẽ, danhoprum na da'ãma 're dawata za'ra mono õ di za. Duré damama norĩ nhimiroti hã da te 're wapari za'ra mono õ di za. 'Re ãhãimana u'ãsi mono nhimiroti hã da te 're wazéb za'ra mono õ di za duré.

³ Duré 're ãdisisawi pese za'ra mono zé hã dama 're hãimana mono õ di za, dapẽ'ẽ 'remhã. Duré da'ãma dapẽ'ẽzézé hã dama 're hãimana za'ra mono õ di za. Duré taré te za dawasédé hã da te da'ãma 're sa'ra za'ra. Duré dawasété wi dasina 're danhiptete za'ra mono õ di za. Duré dazahi u'ãsi te za 're dahãimana za'ra. Duré 're ãdahãimana wẽ za'ra mono norĩ hã te za taré dasi'upana da te 're 'ruiwapari za'ra.

⁴ Duré dasiré nherẽ, te za 'râwi dasisada 're dahâimana za'ra. Duré dapẽ'ẽ 're, rosa'rata waptu na, marĩ ãwasédé hã te za da te 're 'manharĩ za'ra. Duré danhipai u dawaihu'u pese newa, te za 'râwi dapẽ'ẽ na dasina 're dawata za'ra. Duré 'Re ãhâimana u'âsi mono zawi'wa, 're danomro mono õ di za. Ta hã dama wẽ õ di za. Dato si dama ãwẽ hã za oto.

⁵ 'Re ãhâimana u'âsi mono nhimiroti na 're dahâimana wẽ za'ra mono da, da te dasima 're wẽ za'ra mono newa, tazahã, da te dasima 're wẽ za'ra mono õ di za, tiwaihu'u pese na te te 're ãda'apawapto mono da hã, ãma 're ãdahâimana wẽ za'ra mono zéb da hã. Taha wa, te za ta norĩ nhiti 're aihâimana mo.

⁶ Ta norĩ hã hâimana nhipese na danhorõwa u te za datême 're sihutu. Te za pi'õ norĩ hã tizadawa nhipese na te te 're 'rãmi za'ra. Tawamhã sib'uwa na 're hâimana za'ra mono wamhã, te za te te ãma 're sasõmri za'ra. Pi'õ norĩ hã marĩ ahã na te te 're 'manharĩ wasété za'ra mono wa, te za robzei'õ na 're hâimana za'ra. Siwa'ru te za ta norĩ hã 're hâimana za'ra, te te sima 're ãwẽ za'ra mono zéb uwaibaba.

⁷ Pi'õ norĩ hã, ni'wam norĩ nhimirowasu'u hã te te 're wapari ze za'ra mono nherẽ, roti tô sena hã niwa te te ãwaihu'u za'ra da hã, mare di za.

⁸ Duréihã ma tô aibã norĩ hã Mozésihi nhimiroti da, sada 're hâimana zahuré, Zanesi norĩ hã Zabirihĩ me. Tane ãhãna senai'õ na rowasu'u'wa norĩ hã te tô sena roti zada 're hâimana za'ra. Ta norĩ nhimirosa'rata wẽ hã robaba di. Duré Wanhib'apito ãma ãsimirowasu'u hã tô senai õ di. Taha wa, te za 'Re ãhâimana u'âsi mono hã ta norĩ hã te te siwi 're awẽ'õ.

⁹ Zanesi norĩ hã Zabirihĩ me, ma tô dasiwi

waihu'u zahuré ni, ĩsimiza'rese'õ na. Tane te za oto ĩsimiza'rese'õ na dasiwi waihu'u za'ra ni, senai'õ na rowasu'u'wa norĩ hã. Tawamhã ta norĩ nhimirowasu'u hã da te 're wapari hã za'ra mono õ di za oto.

Paruhu nhimiroti 'rãsutu na rowasu'u

¹⁰⁻¹¹ A hã ma tô ĩwaihu, ĩnhimiroti na, duré ĩhâimanazém na, duré dapawaptom na ĩnhimiromhuri na te ĩsina 're ĩroti mono zém na, duré Wanhib'apito umnhasi sina 're ĩhâimana mono zém na, duré da'ãma ĩwa'a su'u õ na 're ĩhâimana mono zém na, duré te 're ĩda'azawi pese mono zém na, duré marĩ ahâ na ĩzada 're hâimana mono nherẽ, Wanhib'apito ãma ĩsina ĩnhiptete sina 're ĩhâimana mono zém na zama. Ma tô duré ĩwaihu, da te ĩma 're ĩrob'manharĩ wasété za'ra mono zém na hã, duré te 're ĩrobzépata mono zém na hã. Ma tô duré ĩwaihu, marĩ hã ĩzô 're ĩwairébé mono zém na hã, Ātizotiza na 'ri nho'õmo nhisi ãma, duré Iconizu ãma, duré Risitira ãma. ĩpipa na da te ĩãma 're rob'manharĩ wasété za'ra mono wa, wa tô te 're robzépata za'ëtẽ. Tane nherẽ, ĩdâ'â tã da, ma tô Wanhib'apito hã nasi ĩnho'reptu a'â.

¹² Cristu Zezusihĩ ãma 're dahâimana wẽ za'ra mono da, da te dasima 're wẽ za'ra mono 'ru te, dasi'uihã na te za tô ĩsazei'wa norĩ ma, da te 're rob'manharĩ wasété za'ra.

¹³ ĩwasété norĩ hã, duré ĩhâimana nhipese norĩ hã te za 're siwasété pese za'ra. ĩsadawa nhipese na te za da te ãma 're sasõmri za'ra. Te za duré dapẽ'ẽ 're dasima 're dazadawa nhipese za'ra.

¹⁴ Tane nherẽ, ta norĩ ne 're aihâimana mono õ di za. Tô sena roti hã ma tô dawi 're ĩ'awaihu'u mo. Taha na si te za 're aihâimana u'âsi mo. Roti hã

tô sena hã ma tô asina 're ãsazei mo. Tô sena roti na aima rowaihu'u'wa norĩ hã, aima waihu'u pese za'ra di.

¹⁵ 'Watébrémi na 're aihâimana mono zém hawi, aima waihu'u pese di, 'Re ãhâimana u'âsi mono nhimiroti 'rata na rob'ui'ééré hã. Taha zarina hãiwã hawi rowaihu hã te aima 're hâimana, asõ'reptuzé hã asina ã'uwaimramizéb da hã, Cristu Zezusihi zazei'wa 're aimorĩ wa.

¹⁶ Uburé ãsimiroti wẽ na rob'ui'ééré hã, 'Re ãhâimana u'âsi mono te te dama 're ã'awaihu'u mono zéb zarina si, te dama 're hâimana za'ra. ãne wa, ãsimiroti mono bâ wẽ di, roti tô sena na, da te ãma 're ãdapawaptob za'ra mono zéb da hã. Duré wẽ di, ãsimiroti hã, danhimiroti tô senai'õ na, da te dama ãma 're ãrowaihu'u za'ra mono zéb da hã. Duré wẽ di, ãsimiroti hã, dahâimanazém na da te 're upa za'ra mono wamhã, da te dama ãma 're ãroti za'ra mono zéb da hã, ãma 're ãdahâimana wẽ za'ra mono da hã oto.

¹⁷ Taha da, te dama 're hâimana, 'Re ãhâimana u'âsi mono nhimiroti hã, tãma ãromhuri'wa norĩ ma ãwaihu'u pese zéb zarina, ãwẽ na te te tãma ãma 're ãdapawaptob za'ra mono zéb da hã.

4

¹⁻² Wa za oto marĩ hã aima ti'ru, 'Re ãhâimana u'âsi mono nho'a, Cristu Zezusihi nho'a zama. Nimãhã bãtã na te za Cristu Zezusi hã dahâimanazém na da'awaihu'u, dawasété na, dawẽ na zama. Taha zarina, te za aihĩni norĩ ma dama arowairébé, dahãiba ré norĩ ma, duré adã'ã norĩ ma zama. Wanhãb'apito hã te za wei mo apã, Danhãb'apito uptabi na oto dama 're sãmra mono da. ãne wa, wa za aima ti'ru. Ma'ãpé,

Wanhib'apito wasu'uwẽ na dama 're rowasu'u u'âsi mono za. Asô danhimiparizém na, duré asô danhimipari õ zém na zama, te za Wanhib'apito wasu'uwẽ na 're ĩda'apo're pu'u u'âsi mo. Da'âma aiwa'a âna, te za asimiroti na 're ĩda'apawapto mo, dawasété na 'râwi 're dasisãmri za'ra mono da, dawasédé hã da te 're rême pese za'ra mono da, dawẽ na si oto 're dahâimana za'ra mono da.

³ E marĩ wa, wa ãne aima ti'ru. Nimahã na hã sena roti hã da te 're wapari ze za'ra mono õ di za. Rowasu'u hã da te 're ĩwapari ze za'ra mono zéb uwaibaba si, te za da te 're wapari za'ra. Dama rowahutu'wa da, te za da'ahâ na da te dasima 're pisutu za'ra, rowasu'u hã da te 're ĩwapari ze za'ra mono zéb uwaibaba si, te te dama 're wasu'u za'ra mono da.

⁴ Roti tô sena uptabi hã te za da te 're rême za'ra, da te 're wapari za'ra mono tã da, dahi'rata norĩ nhimirob'rãzarõtõ 'rata si, da te 're wapari za'ra mono da oto.

⁵ Ta norĩ ne 're aihâimana mono õ di za. Asimiza'rese te za 're aihâimana mo. Aihâiba na te za 'râwi 're asi'madâ'â mo. Duré, Wanhib'apito zazei'wa 're aimorĩ 'ru te, da te aima 're rob'manharĩ wasété za'ra mono nherẽ, 're asisawi mono õ di za, 're robzépata mono tã da hã. Te za duré Wanhib'apito wasu'uwẽ na 're ĩda'apo're pu'u u'âsi mo, 'Re ĩhâimana u'âsi mono te te aima ĩpisutuzéb zarina, asimiromhuri na tãma âma 're uwaimrami mono da.

⁶ Wa za oto aima ĩsiwasu'u. ĩnhibâdâ hã romhuture di oto. Wanhib'apito zadawa wasu'u'wa 're ĩmorĩ 'ru te, za da te dasiwi ĩwĩrĩ nherẽ, ĩdâ'â tã da, ĩsisawi õ di za.

7-8 'Re dasi'wamhâri za'ra mono wa, danhiptete na dasiwi 're ĩdawairébé mono ne, wa tô wa hã ĩnhiptete na 're ĩpusi. Duré dawara na dawı ĩwatobro ne, wa 're ĩhâimana, Wanhib'apito ma, ĩnhimiromhuri na te ĩsina tâma uwaimrami pari wa. Cristu umnhasi sina, wa tô duré 're morĩ u'â, ĩsimiroti 'madâ'â sina. Ni'wa hã dawara na dawı watobro wê te, te za ropsu 'manharĩ hã sô tihâiba, da te âma ĩsôprezéb da hã. Tane, te marĩ ĩwê uptabi hã ĩzô 're hâimana, Wanhib'apito ma, ĩnhimiromhuri na te ĩsina tâma uwaimrami wê te. Nimahã na te za bâdâ hã ĩwa waptârâ, Wanhib'apito apâ we ĩmorĩzéb da hã, dahâimanazém na te te ĩda'awaihu'uzéb zarina, te te dama ĩ'arowairébézéb da hã. Tawapsi, ta hã wê uptabi wa, te za marĩ ĩwê uptabi hã ĩma pisutu, ĩ'uwaibaba si. E ĩma si te za pisutu. Mare di. Aihĩni Wanhib'apito zawi te, wei ĩmorĩzéb zô 're ĩsimipari za'ra mono norĩ ma zama, te za duré marĩ ĩwê uptabi hã tâma pisutu za'ra.

Paru hã Timotiuhu ma, marĩ na te te ĩpo're pu'uzém na rowasu'u

⁹ Ma'âpé, asima rowairébé su'u, we ĩtême aimorĩ su'u da, ĩzabu da.

¹⁰ Demasi hã ĩ'âma sapa'a ô di oto. Ma tô ĩwi watobro, Tesaronita na 'ri nho'ômo nhisi u morĩ da, marĩ hã te te sima awê wa, taha na oto 're morĩ da. Teresêti hã ma tô mo, Darasiza na danhipti'a nho'ômo nhisi u. Titu hã ma tô duré mo, Damasiza na danhipti'a nho'ômo nhisi u.

¹¹ Rucasihi si te ĩ'rata nhamra. ãne wamhã, Marcusihi zô rowaimrami mono za, sôpêtê da,

asiré we saprõni da, ãnhimiromhuri na te te 're ãpawapto mono da.

¹² Wa hã wa tô Titicu hã satõ, Épézu na 'ri nho'õmo nhisi u morĩ da.

¹³ Tawamhã, we aimorĩ wamhã, ãsi'ubuzé hã we ãma âri za, Capuhu nhorõwa ãma te ãrême hã, Torowadi na 'ri nho'õmo nhisi ãma. ãbahã zama, we ãma duri za. ãbahã hã romhã 'manharĩ hã, ãma wẽ uptabi wa, ta norĩ zama we ãma duri za.

¹⁴ Aresãdiri hã ma tô ãwi ro'wa'rutu pese, ãsi'uwazi na romhuri'wa hã. Wanhib'apito si te za tãma ãma wa'rã, marĩ te te ãma ã'ab'manharĩ wasété zé wa'rãmimhã.

¹⁵ Taha aibã hã ma tô wanhimirowasu'u na hã wazada tihãiba, sahi sina. Ma'ãpé tiwi 're asi'madã'ã pese mono za.

¹⁶ Da'ãma rowairébé'wai ma, ãsiwasu'u 'rata wamhã, ãhãimana wasété õ zém na hã, ni'wa hã ã'ãma sapa'a õ di aré, tinhimiroti na ã'ãma sime da. Aihĩni ma tô ãwi sina tipahã za'ra. Tane nherẽ, te ãsima wẽ õ di, da te ãrẽmezém na te te dama ãma ã'awa'rãmi da hã, 'Re ãhãimana u'ãsi mono hã.

¹⁷ Da te ãrême za'ra nherẽ, ma tô Wanhib'apito hã ã'rata tihãiba, te te ãnhiptete da, 'ri para zudezu'õ norĩ ma, te rowasu'u da, Wanhib'apito wasu'uwẽ na. ãne wamhã, ma tô Wanhib'apito hã ãnho'reptu, ãdã'ã tõ da a'ã.

¹⁸ Tane te za Wanhib'apito hã duré rowasété hawi ãnho'reptu, hãiwa u te te ã'ãwisi wẽ da, tinhib'a'uwẽ norĩ te te 're ã'ab'madã'ã mono zéb u hã. Ta hã wẽ uptabi wa, aihĩni wa za ãma 're wawata u'ãsi za'ra.

Paru hã sisa'u te te ãdazawizém na rowasu'u

19 Ma'ãpé ãma sawi zahuré na, Prisira norĩ hã Atiraha me. Duré ãma sawi za'ra na, Onesiporuhu nhorõwa 're, 're ãhãimana za'ra mono norĩ hã.

20 Erasitu hã ma tô ãza'u nhamra, Corĩtu na 'ri nho'õmo nhisi ãma. Toropimu hã hãzé wa, wa tô tirẽ, Miretu na 'ri nho'õmo nhisi ãma.

21 Ma'ãpé, niha asina rosa'rata, rowa'u'u wahã 're sa'wari mono õ ré, we aimorĩzéb da hã. Wasiré ãsazei'wa norĩ hã te ãma asawi za'ra, Eburu, duré Pudeti, duré Rino, duré Caradiza. Uburé ãsazei'wa hãiba amo norĩ hã te duré ãma asawi za'ra.

22 Timotiu, wa ãsima aiwẽ, Wanhib'apito hã 'rãwi aipẽ'ẽ 're, 're ãsãmra mono na, asina 're waihu'u u'ãsi mono da. Duré 'Re ãhãimana u'ãsi mono wi, wa tô te tiwi 're waptẽrẽ u'ãsi, ãsimizawizé hã uburé ai'ãma za'ra wa'aba 're hãimana u'ãsi mono da.

'Re ãhãimana u'ãsi mono zadawa wasu'u
New Testament in Xavãnte (BR:xav:Xavãnte)

copyright © 2004 Wycliffe Bible Translators, Inc.

Language: Xavãnte

Translation by: Wycliffe Bible Translators, Inc.

Xavãnte [xav], Brazil

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 1882536746

The New Testament

in Xavãnte

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

744f0b3a-210f-53c7-b3a1-39b62617ba0c